

Tgi vegn suenter Bush?

Triumfescha la speranza u l'experientscha?

DA GUIU SOBIELA-CAANITZ

■ **Il schaner da mintga onn basest entschaivan vischinas e vischins dals Stadis unids a pinar l'elecziun da la persuna che duai occupar la Chasa alva da Washington durant quatter onns davent dal proxim Bumaun. Fin en november porscha l'onn basest surpraisas nundumbraivlas, procurond per tutta sort tensiuns ed aspectativas.**

2004 è la situaziun vegnida clera vaira svelta; gia durant l'enviern han ins savì ch'i vegnia ad in duel tranter president Bush e senatur Kerry. Questa giada vegn ins a spetgar pli ditg per conuscher ils nums da las duas persunas che duajan candidar per la presidenza ils 4 da november e da quellas duas che stessan a disposiziun sco «vices». Ussa san ins bain numnar las duas persunas, commembras dal senat federal, che paran da vegnir en dumonda per la presidenza: ma domaduas vulan candidar per la partida democratica (PD), entant ch'ils republicans han ad interim paucas vistas da triumfar, suenter la politica desastrusa da Bush e la situaziun economica malsegira. L'elecziun d'ina u l'autra da lezzas duas personalitads muntass en mintga cas ina pitschna revoluziun en la tradiziun politica dals Stadis unids. Dapi lur naschientscha 1789 sco republica federala presidiala, cun president George Washington (1732–1799), èn tut lur chaus da stadi umens da razza alva; ma ussa para probabla, per november, l'elecziun da senatura Hillary Rodham Clinton (New York) u quella da senatur Barack Hussein Obama (Illinois), figl d'in immigrà da l'Africa da l'ost. Areguard la persuna dal president fiss quai la revoluziun la pli memorabla dapi l'elecziun 1960 da l'emprim e fin uss unic president catolic John

Fitzgerald Kennedy (1917–1963) en quel pajais da ferma tradiziun protestanta. La senatura ed il senatur candidassan omdas per la medema partida, per finamiras politicas analogas, ma duvrassan strategias differentas.

Surmuntar ils foss tranter partidas

La postulanta, naschida ils 26 d'october 1947 a Chicago/Illinois, ha frequentà cun success la facultad da giurisprudenza da la renomada Universitad da Yale/Connecticut. Sco advocata è'la vegnida professuressa a l'Universitad dal stadi federativ da l'Arkansas. Tar l'elecziun presidenziala da 1992 e suenter ha'la sustegnì cun success ses um Bill Clinton. 2000 e puspè 2006 l'ha il pievel dal stadi da New York elegida senatura. «The Economist» (Londra) dals 12 da schaner scriva (p. 35): «Sia tenacità inspirascha respect, ses spiert è ordinà, sia organizaziun starmentusa, e sia voluntad d'esser pussanta faschess impressiun a Nietzsche». Ses program social plascha a quels votants che sa sentan economicamain smanatschads. Ses concurrent Obama, naschì ils 4 d'avust 1961 a Honolulu/Hawaii, è vegnì bandunà dal bab cun 2 onns. Cun 6 è'l i a star en l'Indonesia cun la mamma e ses segund consort; cun 10 è'l turnà a las Insulas Hawaii, tar ils geniturs da la mamma. «El ha studegià giurisprudenza a l'Universitad Columbia da New York ed a la 'Harvard Law School' [Massachusetts], nua ch'el è stà l'emprim editur da derivanza africana per la renomada revista universitara 'Harvard Law Review'. Suenter il diplom ha'l avert a Chicago in agen biro d'advocatura. 1996 è'l vegnì elegì senatur dal stadi da l'Illinois per la PD; lur ha'l surpiglià la presidenza da la cumissiun da sanad e d'assistenza publica. El è vegnì



Hillary Clinton e Barack Obama èn ils favorits dals Democrats per la successiun da George W. Bush.



FOTOS KEYSTONE

enconuscent grazia a las numerusas leshas ch'el ha inoltrà cun success davart l'execuziun da chastis, il cumbat encunter il Sida, ils levgiaments da taglia per famiglias da lavurers cun blers uffants euv. (...). Sco commember dal senat federal dapi 2004 (...) ha'l pruva da surmuntar ils foss tranter partidas; el defenda posiziuns liberalas sanestras, ma na refusescha betg sistematicamain las opiniuns da ses adversaris politics*. Sco president federal less el «crear in moviment naziunal per la refurma che cumpigliass er independents e republicans trumpads (...). Ils republicans paran pli spaventads da ses messadi da speranza che dal mesadi d'experientscha derasà da senatura Clinton» («The Economist», 12 da schaner, pp. 38-39). En in discurs memora-

bel ha Obama declarà 2004: «I na dat ni in'America naira, ni in'America alva, ni in'America da linguatg spagnol, ni in'America asiatica; i dat ils Stadis unids da l'America» (cità da la «NZZ» dals 29 da december 2007, p. 7). Sia refusa da mintga polarisaziun fa endament nossa aspiraziun svizra al consens, ubain quai che François Bayrou ha pruva adumbatten en Frantscha tar las elecziuns legislativas da 2007. Ins respecta l'experientscha da senatura Clinton, ma ins la renfatscha da polarisar.

Sfida en Nevada ils 19 da schaner

Dapi ils 3 da schaner tschernan omdas partidas, stadi per stadi, las persunas incumbensadas d'eleger il president u la presidenta en november. Dus stadis

nua che las partidas han gia tschernì han fatg smirvegliar. En l'Iowa dals 3 spetgav'ins la victoria da Clinton tar la PD, ma Obama ha survegnì var 17 000 vuschs dapli. En il New Hampshire dals 8 spetgav'ins pia la victoria dal senatur, ma la senatura ha survegnì var 7500 vots dapli. Questas differenzas èn uschè minimas ch'il cumbat resta tuttafatg avert. Ussa spetg'ins plain mirveglias il scrutini da sonda, ils 19, en il stadi da Nevada, l'uscheditg «Sage Brush State» («stadi da l'assens [Artemisia]»). Il num spagnol «Nevada» («cuverta da naiv») fa endament l'appartegnientscha al Mexico avant 1848. La Nevada crescha svelta, grazia a sias ritgezass mineralas (argient viv, argient, aur, petroli euv.) ed il turissem en la «Death Valley» e las chasas da giu da Reno e Las Vegas; il stadi dumbrava strusch 300 000 olmas dal 1960, oz èn 2,5 milliuns. «The Economist» dals 12 rapporta (p. 40): «Personalitads da la PD en Nevada sustegnan Clinton, ma dus sindicats ordvart fermes han gist sa declerads per Obama: La 'Culinary Workers Union', cun var 60 000 commembers che lavuran cunzunt en casinos, (...) e la 'Service Employees International Union', pli pitschna, ma che po far vegnir organisaturs da la California limitrofa». Ils 26 da schaner tscherna la PD da la Carolina dal sid; en quest stadi atlantic spetg'ins ina maioritad per Obama, grazia a la ferma populaziun naira. Ma il termin decisiv pudess crudar dal «Super Tuesday», ils 5 da favrer, noss marditschaver, tar las radunanzas electoralas democraticas da 22 stadis federativs; lura savainsa segir dapli.

* Der Fischer Weltalmanach 2008. Frankfurt/Main (S. Fischer, ISBN 978-3-596-72008-8) 2007, pp. 791–792, chavazzin «Obama, Barack Hussein».